



**SEJARAH**

**PERSATUAN MELAYU**

**PULAU PINANG**

**(PEMENANG)**

**Ditubuhkan pada 1927**

# **SEJARAH PERSATUAN MELAYU PULAU PINANG (PEMENANG)**

## **1927-1997**

### **LATAR BELAKANG ORANG-ORANG MELAYU PADA ABAD DUA PULUH**

Pada awal Abad 20, kesedaran orang-orang Melayu mula timbul untuk menubuhkan Persatuan-Persatuan bagi menjaga kepentingan orang-orang Melayu dalam perkara-perkara kebajikan, ekonomi dan politik setelah masaalah-masaalah sosial, ekonomi dan politik orang-orang Melayu di timbulkan oleh Akhbar-Akhbar Melayu yang berpengaruh ketika itu.

Maka muncullah di negeri Pulau Pinang pada awal Abad 20 ini, gulungan pertengahan Melayu yang mendiami kawasan di sekitar Georgetown yang terdiri dari saudagar-saudagar dan orang-orang Melayu yang menerima pendidikan Inggeris. Walaupun orang-orang Melayu di Pulau Pinang merupakan gulungan kecil terutama di bandar namun perkembangan perdagangan sehingga ke Abad 20 telah dapat melahirkan saudagar-saudagar Islam terutamanya dari gulungan peranakan India, Arab dan Acheh. Gulungan ini pada ketika itu berhak menggunakan pelajaran-pelajaran untuk anak-anak mereka yang disediakan oleh Pemerintah Inggeris Negeri-Negeri Selat.

Pelajaran Inggeris secara formal yang disediakan oleh Pemerintah Inggeris Negeri-Negeri Selat hanya bermula pada tahun 1816 apabila Sekolah Penang Free ditubuhkan. Sekolah Penang Free merupakan Institusi pendidikan bagi melatih bakal pegawai-pegawai tadbir rendah yang terdiri dari kalangan penduduk tempatan.

Sekolah Penang Free ini umumnya menampung gulungan yang mampu iaitu anak-anak gulungan pertengahan Melayu yang mendiami di sekitar Georgetown. Gulungan pertengahan Melayu yang menerima pendidikan dari Sekolah Penang Free kemudian menjadi pegawai-pegawai tadbir rendah pemerintah Inggeris di Pulau Pinang. Pendidikan Inggeris yang diterima serta hubungan rapat mereka dengan pegawai-pegawai Inggeris dan dengan sistem organisasi Inggeris meletakkan mereka sebagai gulungan yang mempunyai potensi kepimpinan.

Pada awal Abad 20 juga, Negeri Pulau Pinang mengalami kemunculan 2 kumpulan elit. Satu kumpulan ialah mereka yang berorentasikan gagasan Islah Islam yang mempunyai pengetahuan Islam yang mendalam sebagai elit berpendidikan agama. Sementara satu kumpulan lagi muncul dari gulungan pertengahan Melayu yang berpendidikan Inggeris. Dalam konteks kesedaran kebangsaan dan kesedaran politik yang membawa kemunculan gerakan kebangsaan dan gerakan politik, kedua-kedua gulungan elit ini memainkan peranan dan bertindak sebagai penggerak, pemaju dan pemimpin bagi orang-orang Melayu Negeri Pulau Pinang.

Persatuan Orang-Orang Melayu Pulau Pinang di peringkat negeri yang mula-mula ditubuhkan ialah “THE YOUNG MUSLIM UNION” (“Y.M.U.”) iaitu pada tahun 1911. Persatuan ini mempunyai tiga dasar dan tujuan iaitu bagi memelihara dan mengangkat nama anak-anak Islam di Negeri Pulau Pinang, melatih Ahli-Ahlinya supaya gemar kepada membaca Akhbar dan menjaga kesihatan badan dan menggalakan Ahli-Ahlinya bersahabat dengan satu sama lain.

Persatuan “THE YOUNG MUSLIM UNION” (“Y.M.U.”) ini terdiri dari gulungan elit Melayu yang berpelajaran Inggeris dan yang berkhidmat dengan Kerajaan Inggeris sebagai Pegawai Tadbir dan ianya tidak meliputi orang-orang Melayu yang ramai yang berpendidikan Melayu dan berpendidikan Agama seperti Guru-Guru Melayu Saudagar-Saudagar Melayu, Peniaga-Peniaga Melayu dan lain-lain yang tidak berpendidikan Inggeris. “Y.M.U.” bolehlah ditafsirkan sebagai Persatuan elit dan keanggotaannya terhad (closed society).

### **PENUBUHAN PERSATUAN MELAYU PULAU PINANG**

Pada jam lebih kurang 4 petang pada hari Ahad, 27 Mac, 1927, maka bekumpullah orang-orang Melayu yang terdiri dari cerdik-pandai dan hartawan Melayu di masa itu di rumah seorang hartawan Melayu, Tuan Mohamad Ariff Tajuddin yang lebih terkenal dengan nama Mohamad Ariff yang mana rumah beliau terletak di Jalan Hatin, Pulau Pinang yang sekarang ini, tapak tersebut dijadikan rumah kediaman Guru-Guru Sekolah Sri Tanjung berhadapan dengan Masjid Jalan Hatin.

Perhimpunan pada hari tersebut telah berbincang untuk mengadakan sebuah Persatuan bagi menjaga kepentingan bangsa Melayu dan agama Islam dibawah penjajahan British. Dalam perjumpaan tersebut, maka kata sepakat telah pun dicapai untuk menujuhkan sebuah Persatuan yang diberi nama Penang Malay Association (P.M.A.) atau Persatuan Melayu Pulau Pinang.

Setelah undang-undang Persatuan digubal dan diluluskan oleh Pendaftar Pertubuhan, maka Mesyuarat Agung Persatuan yang pertama yang diadakan pada 9 Mei, 1927, telah melantik orang-orang kenamaan seperti nama yang tersebut dibawah ini menjadi Anggota Pertama untuk mentadbirkan Persatuan ini:-

YANG DI PERTUA	- Dr A.O. Merican
NAIB YANG DI PERTUA	- Tuan Mohamad Raus Bin Chik Tuan M.Z. Merican Tuan Mohamad Hashim Bin Iskandar
SETIAUSAHA	- Dr. Kamil Mohd Ariff
BENDAHARI	- Tuan M.N. Merican
AHLI-AHLI JAWATANKUASA	- Tuan A. Abdullah Tuan M.S. Ariffin Tuan U.M. Bakar Tuan Hj Murshid Tuan Mohamad Hussain Tuan T. Nyak Puteh Tuan S. Mohamad Thambi
PEMERIKSA KIRA-KIRA	- Tuan C. Mohamad Ismail Tuan Kapt. Baba Ahmad

Persatuan Melayu semasa diluluskan pendaftarannya telah diberi pengecualian pendaftaran (exempt Society) oleh Kerajaan ketika itu.

Penaung-Penaung Persatuan yang dilantik semasa penubuhannya ialah:-

- (1) Gabenor Negeri-Negeri Selat, Sir Hugh Clifford
- (2) Sri Paduka Sultan Perak, Duli Yang Maha Mulia Sultan Alang Iskandar
- (3) Regent Negeri Kedah, Yang Amat Mulia Tengku Ibrahim

Penang Malay Association atau Persatuan Melayu Pulau Pinang semasa ditubuhnya mengandungi tanah besar Seberang Perai dan Dinding oleh kerana jajahan Pulau Pinang ketika itu termasuk Dinding dan Pangkor di Negeri Perak.

Persatuan Melayu Pulau Pinang ialah Persatuan yang menjadi suara dan mewakili kepentingan orang-orang Melayu Pulau Pinang dalam memajukan kehidupan orang-orang Melayu di Pulau Pinang. Persatuan Melayu Pulau Pinang juga cuba mengujudkan perpaduan di kalangan orang-orang Melayu dan menjadi suara orang Melayu yang tinggal di Negeri Pulau Pinang.

Ada juga pendapat yang mengatakan bahawa Persatuan Melayu Pulau Pinang merupakan Persatuan yang dianggotai oleh orang-orang Melayu Peranakan yang tinggal di Pulau Pinang khususnya di sekitar Georgetown. Tambahan pula pegawai-pegawai tinggi dalam Persatuan Melayu Pulau Pinang adalah terdiri dari orang-orang Melayu yang menjadi para pentadbir Kerajaan Inggeris dan adanya penah dianugerahkan Bintang Kehormatan Kerajaan Inggeris. Persatuan Melayu Pulau Pinang ketika itu pada tiap-tiap tahun mengadakan Perayaan Menyambut Hari Keputeraan Raja Inggeris dan juga merayakan Hari Poppy.

Pada tahun 1933, Persatuan Melayu Pulau Pinang telah berjaya mengadakan perubahan apabila satu cadangan dibuat supaya semua Persatuan-Persatuan Melayu yang ada di Negeri Pulau Pinang digabungkan dengan Persatuan Melayu Pulau Pinang. Cadangan ini telah diterima dan mulai dari tahun tersebut keanggotaan Persatuan Melayu Pulau Pinang bertambah ramai dan bolehlah dikatakan ianya benar-benar menjadi suara orang-orang Melayu Pulau Pinang. Oleh kerana pemimpin-pemimpin Persatuan Melayu Pulau Pinang ketika itu mempunyai hubungan yang rapat dengan pegawai-pegawai Inggeris di Pulau Pinang, Persatuan Melayu Pulau Pinang diberi kuasa untuk memilih calon orang Melayu bagi dianugerahkan Jaksa Pendamai atau J.P. Begitu juga Persatuan Melayu Pulau Pinang diminta menamakan Ahli-Ahli Melayu untuk menduduki dalam Penang Settlement Council dan Federal Legislative Council dan Majlis Municipality.

Jasa Persatuan Melayu Pulau Pinang yang menjadi ingatan sejarah sehingga hari ini ialah dengan mengemukakan satu memorandum kepada pihak yang berkuasa kerajaan British di London (Colonial Office, London) untuk mengujudkan tanah simpanan Melayu di Pulau Pinang pada tahun 1933. Tiga orang pemimpin yang ditugaskan merangka Memorandum tersebut ialah Dr. Kamil Mohamad Arif, Kapt. Mohamad Nor Bin Mohamad dan Kapt. Syed Salleh Alsagoff. Setelah Memorandum ini dikemukakan oleh Persatuan Melayu

Pulau Pinang kepada Kerajaan British, peruntukan sebanyak \$40,000/= telah pun diluluskan untuk membeli sebidang tanah di Kampung Melayu, Air Itam, Pulau Pinang untuk dikhaskan sebagai tanah simpanan Melayu. Barang diingati bahawa inilah satu-satunya Tanah Simpanan Melayu yang dikhaskan dalam sebuah Tanah Jajahan British (British Straits Settlement) dan ianya masih kekal sehingga hari ini.

### **PEMERINTAHAN TENTERA JEPUN**

Semasa pemerintahan Tentera Jepun, kegiatan-kegiatan Persatuan Melayu Pulau Pinang tidaklah begitu aktif oleh kerana sekatan-sekatan berpersatuhan dikenakan oleh Pemerintahan Tentera Jepun. Namun demikian, pemimpin-pemimpin Persatuan Melayu Pulau Pinang diberi kepercayaan oleh Pemerintah Tentera Jepun sebagai wakil orang-orang Melayu Pulau Pinang untuk berunding mengenai dengan hal ehwal sosial masyarakat Melayu.

Tuan Yusoff Izzuddin telah dilantik oleh Pemerintah Tentera Jepun menjadi Yang Di Pertua “Malai San Koi Kai” atau Persatuan Kebajikan Melayu ketika itu, iaitu sebuah Pertubuhan yang ditubuh oleh Pemerintah Tentera Jepun untuk mewakili orang-orang Melayu Pulau Pinang.

### **PEMERINTAHAN TENTERA BRITISH (B.M.A.) AKHIR TAHUN 1945**

Selepas Perang Dunia Kedua iaitu pemerintahan semula penjajah British, semasa Pemerintahan Tentera British di Malaya (B.M.A.) pada akhir tahun 1945, Persatuan Melayu Pulau Pinang bergerak semula dalam kegiatannya menerusi “Bekas-Bekas Pemimpinnya” (oleh kerana kegiatan Persatuan Melayu Pulau Pinang terhenti dari tahun 1941 hingga 1945).

### **PENUBUHAN SEMULA PERSATUAN MELAYU PULAU PINANG 1945/1946**

Bagi memulihkan Persatuan Melayu Pulau Pinang, suatu Mesyuarat diantara Ahli-Ahli dan Pemimpin-Pemimpin Persatuan Melayu Pulau Pinang telah diadakan di Sekolah Al Mashoor, Lebuhraya Tek Soon, Pulau Pinang pada akhir tahun 1945. Dalam Mesyuarat ini, ramai diantara Ahli-Ahli Persatuan Melayu melahirkan pendapat dengan penuh semangat menuntut supaya Persatuan Melayu Pulau Pinang mengubah corak perjuangannya yang dahulu dengan corak perjuangan baru untuk menentang penjajahan Inggeris. Kedengaran dalam Perjumpaan tersebut pekikan merdeka dari para hadirin.

Mesyuarat itu bersetuju supaya undang-undang Persatuan Melayu Pulau Pinang yang lama tidak dipakai lagi dan suatu undang-undang baru selaras dengan corak Perjuangan Melayu yang baru hendaklah digubal. Beberapa mesyuarat untuk menggubal undang-undang Persatuan Melayu Pulau Pinang telah diadakan di kedai Tuan S.M. Eusoff, No. 10, Jalan Burmah, Pulau Pinang yang dijadikan Ibu Pejabat Persatuan. Barang diingati bahawa

beberapa orang pemimpin yang ditugaskan untuk menyusun undang-undang baru Persatuan ialah Tuan S.M. Eusoff, Tuan C.M. Hashim, Encik Abdul Majid Mohammad dan Cikgu Mohd Nor Ahmad.

Setelah undang-undang Persatuan Melayu bercorak baru diluluskan, maka Persatuan Melayu Pulau Pinang bergerak semula dengan cergas dalam menarik ramai lagi orang-orang Melayu bukan sahaja yang tinggal di bandar bahkan juga di kampung-kampung dan luar bandar untuk masuk menjadi Ahli Persatuan Melayu Pulau Pinang. Diantara pemimpin-pemimpin yang menjalankan penerangan ke kampung-kampung untuk mengembangkan dan meramaikan keahlian Persatuan Melayu Pulau Pinang ialah Tuan Kapt. Baba Ahmad, Tuan Mohd Zain Bin Ahmad, Cikgu Mohd Nor Ahmad dan Tuan Mohd Esa Bin Ahmad. Maka ramailah orang-orang Melayu memberi sokongan kepada Persatuan Melayu Pulau Pinang dengan menjadi Ahli Persatuan Melayu Pulau Pinang.

### **PERSATUAN MELAYU PULAU PINANG DAN KUMPULAN BINTANG TIGA, 1945**

Ketika Persatuan Melayu Pulau Pinang beribu pejabat di No 10, Jalan Burmah, Pulau Pinang pada tahun 1945, kegiatan puak Bintang Tiga (Kumpulan Orang-orang Cina) bergiat cergas dan beribu pejabat di Jalan Maxwell, Pulau Pinang. Suatu pakatan serta perjanjian telah dibuat ketika itu diantara wakil-wakil Persatuan Melayu Pulau Pinang (Cikgu Mohd Nor Ahmad dan lain-lain) dengan wakil pemerintah Kumpulan Bintang Tiga, Kawasan Utara Malaya supaya Kumpulan ini tidak mengapa-apakan orang-orang Melayu. Begitu juga jaminan telah diberi oleh Wakil-Wakil Persatuan Melayu Pulau Pinang iaitu orang-orang Melayu tidak akan bertindak terhadap orang-orang Cina.

### **PERHIMPUNAN UNTUK MELANTIK KETUA MELAYU PULAU PINANG, AKHIR TAHUN 1945**

Suatu Perhimpunan Besar Orang-orang Melayu Pulau Pinang yang terdiri dari pemimpin-pemimpin Melayu termasuk Wakil-Wakil dari mukim-mukim seluruh Pulau Pinang telah diadakan pada akhir tahun 1945 di Sekolah Melayu, Jalan Hatin, Pulau Pinang bertujuan untuk melantik seorang Ketua Melayu. Perhimpunan ini ialah suatu perhimpunan yang bersejarah selepas sahaja Pemerintahan Tentera Jepun. Dalam Perhimpunan ini ada dua puak yang masing-masing hendak menonjol calon mereka untuk dipilih menjadi Ketua orang-orang Melayu ketika itu. Didapati juga sedikit kekecoh dan pergaduhan kecil berlaku dalam Perjumpaan tersebut oleh kerana masing-masing berkehendakan calon mereka dipilih untuk menjadi Ketua orang-orang Melayu Pulau Pinang. Akhirnya, tiga nama telah dicalonkan sebagai Ketua Melayu. Nama-nama tersebut ialah Tuan C.M. Hashim, Tuan Yusoff Izzuddin dan Tuan Dr. Kamil Mohd Ariff. Ketiga-tiga calon ini adalah bekas pemimpin Persatuan Melayu Pulau Pinang yang terdahulu. Mengikut keputusan undi kepada pemilihan ini, Tuan Yusoff Izzuddin telah dipilih untuk menjadi Ketua orang-orang Melayu di Perhimpunan tersebut.

## **PERSATUAN MELAYU PULAU PINANG MENENTANG PENUBUHAN MALAYAN UNION, 1946**

Ketika kebangkitan semangat orang-orang Melayu bertambah kemuncak oleh kerana “salah anggapan” (blunder) Kerajaan British terhadap orang-orang Melayu dengan mengutuskan wakilnya yang bernama Sir Harold Mac Michael oleh Baginda King George VI untuk membawa suatu Perjanjian yang dinamakan “Treaty Mac Michael” bagi mendapat tandatangan DYMM Raja-Raja Melayu dengan niat untuk menakluk Malaya. Dengan Perjanjian ini ianya bermakna akan menurunkan taraf dan kedaulatan Raja-Raja Melayu sebagai taraf Kadi sahaja yang akan hanya menjaga Hal Ehwal Agama dan Adat Istiadat Melayu sahaja.

Ketika inilah semangat menentang penjajahan berkemuncak di seluruh negara. Persatuan Melayu Pulau Pinang telah mengambil peranan yang penting bagi meniup semangat orang-orang Melayu Pulau Pinang bersama-sama dengan orang-orang Melayu seluruh negara untuk menyedari pentingnya menentang penjajahan dan bersedia untuk berkerajaan sendiri dan seterusnya mencapai kemerdekaan untuk negara.

Persatuan Melayu Pulau Pinang tidak ketinggalan mengambil peranan yang aktif menentang penubuhan Malayan Union. Satu Memorandum telah pun disediakan oleh Persatuan Melayu Pulau Pinang dan dihantar ke Bangsa-Bangsa Bersatu, kepada Kerajaan British di London dan juga ke Moscow. Jawatankuasa yang menyediakan Memorandum ini terdiri dari Tuan S.M. Eusoff, Tuan Dr. Kamil Mohd Ariff, Tuan C.M. Hashim, Cikgu Mohd Nor Ahmad dan Tuan Abdul Majid Bin Mohamad. Persatuan Melayu Pulau Pinang telah menyertai bersama-sama dengan lain-lain Persatuan dan Pertubuhan dalam Kongres Melayu dan bersejarah pimpinan Dato' Onn Bin Jaafar yang julong-julong kali diadakan di Sultan Sulaiman Kelab, Kampong Baru, Kuala Lumpur pada 1, 2, 3 dan 4 Mac, 1946. Tiga orang wakil Persatuan Melayu Pulau Pinang yang menghadiri Kongres yang bersejarah itu ialah Tuan Yusoff Izzuddin sebagai Yang Di Pertua, Tuan Haji Taha Ali dan Tuan Mohamad Zain Bin Ahmad (Master Zain). Hasil dari Kongres bersejarah ini yang dihadiri oleh seramai 41 Persatuan dan Pertubuhan, sebuah Pertubuhan di peringkat kebangsaan telah pun dipersetujui ditubuhkan dengan diberi nama Pertubuhan Kebangsaan Melayu Bersatu (PEKEMBAR) atau United Malays National Organisation (UMNO).

Setelah urusan pendaftaran penubuhan Pertubuhan ini diselesaikan, maka dalam Kongres Melayu yang Kedua yang diadakan di Istana Besar, Johor Baru pada 11 Mei, 1946 dan 12 Mei, 1946, maka Pertubuhan Kebangsaan Melayu Bersatu (UMNO) telah dirasmikan penubuhannya.

Persatuan Melayu Pulau Pinang adalah salah sebuah dari 40 Persatuan dan Pertubuhan telah diterima menjadi Ahli Pengasas UMNO pada 11 Mei, 1946.

Dengan penerimaan Persatuan Melayu Pulau Pinang menjadi Ahli Gabungan UMNO, maka Ahli-Ahli Persatuan Melayu yang berjumlah lebih kurang 2,000 orang ketika itu diterima terus menjadi Ahli UMNO.

Bergeraklah pemimpin-pemimpin Persatuan Melayu Pulau Pinang dengan menjelajah ke seluruh mukim, kampong dan kariah di Pulau Pinang untuk menarik minat orang-orang Melayu masuk menjadi Ahli UMNO.

Pada tahun 1948, semasa Persidangan UMNO yang diadakan di Sekolah Francis Light, Pulau Pinang pada 23 dan 24 April, 1948, UMNO telah bersetuju menghapuskan Ahli Berdaftar Terus (yakni menerusi Persatuan-Persatuan Bergabung) dan bersetuju menu buhkan UMNO di peringkat negeri-negeri, Bahagian-Bahagian dan Cawangan-Cawangan. Setelah susunan penubuhannya selesai diuruskan di Pulau Pinang, Persatuan Melayu Pulau Pinang mengambil keputusan berpisah dengan kegiatan-kegiatan politik dan menyerahkan urusan-urusan mengenai politik orang-orang Melayu Pulau Pinang kepada UMNO Pulau Pinang. Persatuan Melayu Pulau Pinang terus bergerak dan menumpu segala kegiatan-kegiatan dan aktiviti-aktivitinya dalam bidang-bidang sosial masyarakat, agama, kebudayaan, kesenian, sukan dan sebagainya bagi pihak orang-orang Melayu Pulau Pinang sehingga hari ini.

Barang diingati bahawa diantara pemimpin-pemimpin Persatuan Melayu yang memegang Jawatan tertinggi di dalam UMNO Malaya pada awal-awal penubuhannya ialah Tuan S.M. Aidid yang menjadi Pegawai Ekonomi Dan Kewangan dan seterusnya Bendahari UMNO Malaya pada tahun 1948, Tuan S.M. Zainul Abidin menjadi Pengurus Tetap Persidangan Agung UMNO Malaya semasa UMNO mengadakan Persidangannya di Sekolah Francis Light, Pulau Pinang pada tahun 1946 dan tahun 1948 dan Tuan Kapt. Mohamad Nor Bin Mohamad dilantik menjadi Bendahari UMNO Malaya selepas Tuan S.M. Aidid pada tahun 1950. Tuan S.M. Aidid yang sekarang ini Dato' S.M. Aidid masih berada bersama-sama kita dan sekarang ini menjadi salah seorang Penaung Persatuan Melayu Pulau Pinang.

### **PENUBUHAN SYARIKAT KOPERASI PERUMAHAN ORANG-ORANG MELAYU PULAU PINANG**

Pada tahun 1964, Persatuan Melayu ketika dibawah pimpinan Tuan Syed Abbas Alhabshee telah mengadakan suatu projek tajaan Persatuan Melayu Pulau Pinang bagi menu buhkan Syarikat Koperasi Perumahan Orang-orang Melayu Pulau Pinang dan Syarikat ini telah bergerak dengan maju dan jayanya sehingga ke hari ini untuk menampung keperluan perumahan kepada orang Melayu di dalam bandar khasnya.

### **PINDAAN KALI KEDUA KEPADA UNDANG-UNDANG PERSATUAN MELAYU PULAU PINANG**

Manakala Persatuan Melayu dibawah pimpinan Tuan Hj. Mohamad Nor Ahmad yang lebih dikenali dengan Cikgu Mohamad Nor Ahmad dalam awal tahun 70'an pula, Persatuan Melayu Pulau Pinang telah meminda undang-undang tubuhnya bagi mengemaskini kegiatan-kegiatan serta memantapkan imejnya mengikut peredaran masa dan menukarkan namanya dari Penang Malay Association (P.M.A.) kepada Persatuan Melayu Pulau Pinang ringkasnya "PEMENANG".

## **BANGUNAN PERSATUAN MELAYU PULAU PINANG - JALAN MACALISTER, PULAU PINANG**

PEMENANG dibawah pimpinan Cikgu Mohamad Nor Ahmad telah berjaya mendapatkan sebidang tanah bekas tapak sekolah Melayu Jalan Baru, dipersimpangan Jalan Macalister/Jalan Anson untuk mendirikan Bangunan Persatuan Melayu 3 1/2 tingkat. Tanah tapak Bangunan ini diperuntukan kepada PEMENANG atas ehsan Kerajaan Negeri Pulau Pinang dibawah pimpinan Dr. Lim Chong Eu dengan bayaran nominal RM1/=.

PEMENANG pada 4 September, 1976 telah membuat suatu Perjanjian dengan Perbandaran Pembangunan Bandar (UDA) bagi memajakan tanah yang diperuntukan oleh Kerajaan Negeri kepada PEMENANG dibawah Suratan Hakmilik Sementara, H.S. (D) 36, Seksyen 12 Bandar Georgetown mengandungi luasan tanah 4,564 kaki persegi untuk mendirikan Bangunan Persatuan Melayu Pulau Pinang, tiga setengah tingkat dengan harga RM313,583/=. Dengan Perjanjian ini bermakna persetujuan telah dicapai diantara PEMENANG dengan UDA bahawa pihak UDA akan membina dan mengurus bangunan ini selama 15 tahun dan selepas itu bangunan ini diserah kepada PEMENANG. Dalam Perjanjian ini juga, UDA telah bersetuju untuk memberi RM1,000/= sebulan kepada PEMENANG sebagai perbelanjaan pentadbiran dan satu ruang di tingkat atas berukuran lebih kurang 600 kaki persegi untuk dijadikan pejabat PEMENANG. Setelah 11 tahun, UDA mengurus Bangunan Persatuan Melayu Pulau Pinang ini, hutang yang masih ditanggung oleh PEMENANG ialah RM174,616.94 iaitu lebih dari 50% dari wang pinjaman untuk membina Bangunan Persatuan Melayu Pulau Pinang ini.

Pada 1986, PEMENANG dibawah pimpinan Dato' Haji Mohd. Yussof Latiff telah mengkaji mengenai tanggungan hutang PEMENANG kepada UDA dan telah mengambil keputusan untuk melupuskan hutang ini dengan membuat pinjaman hutang kepada Bank Of Commerce, Cawangan Pulau Pinang secara Pinjaman Berpenggal (term loan) selama 5 tahun. Dengan cara ini, PEMENANG terus memiliki Bangunan Persatuan Melayu Pulau Pinang serta menguruskannya. Dalam tempuh 5 tahun, Pinjaman Berpenggal ini telah dijelaskan kepada Bank Of Commerce tanpa sebarang masaalah.

## **BANGUNAN PEMENANG - 60, JALAN CANTONMENT, PULAU PINANG**

Pada 15 September, 1992, Dato' Haji Mohd. Yussof Latiff selaku Presiden PEMENANG telah mengemukakan suatu cadangan dalam suatu Mesyuarat Jawatankuasa khas PEMENANG supaya PEMENANG memberi pertimbangan untuk membeli sebuah rumah bangalo yang dikenali Geran 19707, Lot 1471, Seksyen 4, Daerah Timur Laut, Georgetown, Pulau Pinang yang beralamat di 60, Jalan Cantonment, 10250 Pulau Pinang yang mempunyai keluasan tanah 8,671 kaki persegi untuk dijadikan pusat kegiatan dan pejabat pentadbiran PEMENANG yang baru. Seterusnya, Dato' Haji Mohd. Yussof Latiff mencadangkan supaya Bangunan Persatuan Melayu Pulau Pinang di Jalan Macalister disewakan sepenuhnya. Dengan pembelian sebuah bangalo ini, maka banyak aktiviti-aktiviti PEMENANG dapat dijalankan dengan memberi lebih kemudahan dan keselesaan kepada Ahli-Ahli PEMENANG. Dengan pembelian bangalo ini juga ianya sebagai suatu usaha permulaan untuk memiliki semula hartanah Melayu di dalam bandaraya Pulau Pinang, kata Dato' Haji Mohd. Yussof Latif.

Cadangan ini telah dikemukakan pula dalam Mesyuarat Agung Khas PEMENANG yang bersidang pada 19 Oktober, 1992 dan telah diluluskan oleh Mesyuarat Agung Khas tersebut. Mesyuarat Agung Khas ini juga telah meluluskan supaya PEMENANG membuat Pinjaman Berpenggal kepada Bank Of Commerce, Cawangan Pulau Pinang sebanyak RM700,000/= dengan bayaran ansuran 5 tahun.

Bangunan No. 60, Jalan Cantonment, 10250 Pulau Pinang telah dibeli dengan harga RM650,000/= dan kos pengubahaian dan pembesaran Bangunan ini ialah sebanyak RM150,000/=, Bangunan ini dinamakan Bangunan PEMENANG dan ianya sekarang ini menjadi pusat kegiatan dan pentadbiran PEMENANG. Banyak pertubuhan-pertubuhan telah menggunakan Bangunan PEMENANG ini untuk mengadakan mesyuarat-mesyuarat dan juga majlis-majlis mereka. Bangunan PEMENANG sekarang ini bukan sahaja menjadi kebanggaan Ahli-Ahli PEMENANG bahkan juga orang-orang Melayu Pulau Pinang.

Bangunan Persatuan Melayu Pulau Pinang di Jalan Macalister kini disewa kepada tiga syarikat yang ternama dengan pendapatan RM18,200/= sebuah. Dari pendapatan ini, sebanyak RM11,800/= dibayar kepada Bank Of Commerce, Cawangan Pulau Pinang tiap-tiap bulan untuk bayaran balik pinjaman berpenggal (term loan) pembelian Bangunan PEMENANG, No. 60, Jalan Cantonment, Pulau Pinang.

### **PINDAAN KALI KETIGA KEPADA UNDANG-UNDANG PERSATUAN MELAYU PINANG**

Bagi memantapkan lagi imej dan kegiatan serta pentadbiran PEMENANG, maka pindaan kepada Undang-undang PEMENANG telah dibuat sekali lagi pada tahun 1990. Undang-undang yang sedia ada telah ditambah dengan memasuki beberapa ceraian-ceraian penting selaras dengan keadaan masa kini. Diantaranya, dibolehkan PEMENANG menerima Ahli Penyokong, mengadakan Aturan Peraturan Mesyuarat Agung PEMENANG yang dipengerusikan oleh Pengurus Tetap yang bukan terdiri dari Ahli Jawatankuasa, Jawatan Yang di Pertua dijadikan Presiden serta ditambahkan satu lagi Jawatan iaitu Timbalan Presiden. Begitu juga Undang-Undang Persatuan ditukar menjadi Perlembagaan Dan Peraturan Mesyuarat Agung Persatuan.

Selain daripada ini, aktiviti-aktiviti PEMENANG sekarang ini ialah mengadakan acara-acara tetap tahunannya seperti berikut:-

- (1) menganjurkan pada tiap-tiap tahun Malam Silatulrahim sempenan Hari Raya Aidilfitri untuk mengiratkan tali silatulrahim sesama orang-orang Islam serta memupuk perasaan muhibbah diantara semua kaum.
- (2) mengadakan pada tiap-tiap tahun, Majlis Terbuka sempenan Awal Muhamarram serta mengadakan penganugerahan kepada Tokoh-Tokoh Masyarakat Melayu yang telah menaburkan jasa bakti mereka dalam berbagai-bagai bidang kemasyarakatan.
- (3) menganjurkan pada tiap-tiap tahun sambutan Maulid Rasul S.A.W. dan syarahan Agama.

- (4) mengasaskan penubuhan Tabung Biasiswa PEMENANG sebagai mengenang jasa PEMENANG untuk dihadiahkan kepada pelajar-pelajar anak-anak Melayu keturuan Pulau Pinang untuk melanjutkan pelajaran tinggi di Universiti-Universiti tempatan atau luar Negeri.
- (5) menganjurkan Temasya Sukan PEMENANG untuk orang-orang Melayu diantara kampung-kampung dan mukim-mukim.
- (6) menubuhkan sebuah Syarikat yang diberi nama Syarikat PEMENANG, Syarikat PIEMPIPI (PEMENANG) Berhad untuk kepentingan Ahli-Ahli dan orang-orang Melayu Pulau Pinang dalam bidang ekonomi dan hartanah.
- (7) menganjur perjumpaan dengan Persatuan-Persatuan semua kaum yang bukan politik yang ada di peringkat Negeri Pulau Pinang bagi membincang dengan tujuan menubuhkan Jawatankuasa Perunding Semua Kaum Peringkat Negeri (All Communities State Liasion Commitee) bagi mengiratkan muhibbah diantara semua kaum serta menjalankan kegiatan-kegiatan kebudayaan, kesenian, sukan dan lain-lain dengan tidak sama sekali terlibat dalam hal-hal politik.

PEMENANG akan terus bergerak dan bergiat bagi memenuhi hasrat dan cita-cita masyarakat Melayu di negeri ini selaras dengan asas dan tujuan PEMENANG sebagai suatu wadah dan suatu warisan bangsa Melayu.

PEMENANG sebagai wadah dan warisan orang-orang Melayu Pulau Pinang, tidak sanggup melihat hal-hal yang menyentuh keadaan sosial masyarakat Melayu dibiarkan tanpa teguran dan tindakan.

PEMENANG sentiasa sensitif dengan isu-isu seperti kebudayaan dan kesenian Melayu yang kian terhakis di negeri ini, dasar pelaksanaan Bahasa Kebangsaan yang kian merosot penggunaannya, peranan Majlis dan Jabatan Agama Islam Pulau Pinang mengawasi dan mengawal tanah wakaf orang-orang Islam serta melaksanakan tugas dan pentadbiran yang cekap selaras dengan Undang-Undang Majlis Agama Islam Pulau Pinang. PEMENANG tidak segan-segan akan menyuarakan pendapatnya serta memberi teguran yang membina mahupun secara mengutus surat dan memorandum ataupun secara siaran akhbar.

PEMENANG yang diasaskan oleh pemimpin-pemimpinnya selama 70 tahun yang lalu telah mencapai kejayaan yang membanggakan kepada kita sebagai pewaris PEMENANG hari ini. Insya Allah, kita akan terus memberi tenaga dan khidmat bakti kita kepada masyarakat Melayu negeri ini menerusi Persatuan yang telah berjasa ini iaitu Persatuan Melayu Pulau Pinang atau PEMENANG.

## **Yang Di Pertua - Yang Di Pertua/Presiden-Presiden Persatuan Melayu Pulau Pinang (PEMENANG)**

1927 - 1928	Tuan Dr. A.O. Merican
1929 - 1930	Honourable Mohd. Raus Bin Chik
1930 - 1933	Tuan Dr. Kamil Mohd. Ariff
1933 - 1934	Tuan Shaik Ibrahim
1934 - 1936	Tuan Haji Shamsuddin Mohd Yunos
1936 - 1938	Tuan S.M. Eusoff
1938 - 1939	Tuan C.M. Hashim
1939 - 1941	Tuan K.P. Abu Bakar
1942 - 1945	Pemerintahan Jepun
1946	Tuan Yusoff Izzudin
1947	Tuan Syed Said Aidid
1948 - 1951	Tuan S.M. Zainul Abidin
1952 - 1960	Tuan Kapt. Mohamed Noor Bin Mohamed
1961 - 1962	Tuan Haji G.M. Yusoff
1963	Tuan Kapt. Mohamed Noor Bin Mohamed
1964	Tuan Syed Abbas Alhabshee
1965 - 1971	Tuan Kapt. Mohamed Noor Bin Mohamed
1972 - 1985	Tuan Mohamed Nor Bin Ahmad
1985 - 1986	Tuan Haji Mohd. Yussof Bin Abdul Latiff (Pemangku Yang Di Pertua)
1987 - Sekarang	Tan Sri Dato' Seri Haji Mohd. Yussof Bin Abdul Latiff

## **Setiausaha-Setiausaha Yang Kehormat Persatuan Melayu Pulau Pinang (PEMENANG)**

1927-1928	Dr. Kamil Mohd Ariff
1928 - 1948	Tidak dapat dikesan
1949	Tuan Haji Ahmad Moktar Bin Mohd Yussof
1950 - 1956	Tuan Abdullah Bin Yahaya
1956 - 1957	Tuan Daud Bin Meah
1957 - 1959	Tuan Mohamad Hashim Bin Ahmad
1960 - 1961	Tuan H.R. Pawanteh
1962 - 1963	Tuan Haji Abdul Rahim Khan Bin Abdul Majid Khan
1964 - 1965	Tuan Haji Aman Shah Bukhari
1966 - 1980	Tuan Haji Azmi Merican Bin Ibrahim Merican
1981 - 1982	Tuan Md. Abu Bakar Bin Hj Ismail
1983 - Sekarang	Dato' Shaik Mohamad Bin Shaik Abdul Kadir

\* Diantara tahun-tahun 1928 - 1948, nama-nama Tuan Kapt. Mohamed Noor Bin Mohamed, Tuan Kapt. Mohamed Noor Bin S. Ahmad (Kapt. Mohamed Noor Tua), Tuan Mohamed Nor Bin Ahmad (Cikgu Mohamed Nor) dan Tuan Mohamed Zain Bin Ahmad (Master Zain) ada disebut pernah menjawat Jawatan Setiausaha Kehormat Persatuan Melayu Pulau Pinang (PEMENANG).

## **YANG DIPERTUA PRESIDEN PERSATUAN MELAYU PULAU PINANG**



Tuan Doktor AO Merican  
YDP 1927 - 1928



Tuan Hon. Mohd Rous  
YDP 1929 - 1930



Tuan Doktor Kamil Mohd. Ariff  
YDP 1930 - 1933



Tuan Shaik Ibrahim  
YDP 1933 - 1934



Tuan Haji Shamsuddin Mohd. Yunooz  
YDP 1934 - 1936



Tuan SM Yussof  
YDP 1936 - 1938



Tuan CM Hashim  
YDP 1938 - 1939



Tuan K.P. Abu Bakar  
YDP 1939 - 1941



Tuan Yussof Izzuddin  
YDP 1946



Tuan S.M. Aidid  
YDP 1947



Tuan S.M. Zainul Abidin  
YDP 1948 - 1951



Tuan Kapt. Mohamed Noor b.  
Mohamed  
YDP 1952 - 1960,  
1963,  
1965 - 1971



Tuan Haji G.M. Yussof  
YDP 1961 - 1962



Tuan Syed Abbas Alhabshee  
YDP 1964



Tuan Mohamed Nor b. Ahmad  
YDP 1972 - 1985



Tan Sri Dato' Seri Haji  
Mohd Yussof Latiff  
YDP 1985 - 1986  
Presiden 1987 - Sekarang

## **SETIAUSAHA-SETIAUSAHA PERSATUAN MELAYU PULAU PINANG**



Tuan Doktor Kamil Mohd. Ariff  
1927 - 1928



Tuan Haji Ahmad Mokhtar  
bin Mohd Yussof  
1949



Tuan Abdullah Bin Yahaya  
1950 - 1956



Tuan Daud Bin Meah  
1956 - 1957



Tuan Mohamad Hashim  
Bin Ahmad  
1957 - 1959



Tuan H.R. Pakwanteh  
1960 - 1963



Tuan Haji Abdul Rahim  
Khan Bin Abdul Majid  
1962 - 1963



Tuan Haji Aman Shah  
Bukhari  
1964 - 1965



Tuan Haji Azmi Merican  
Bin Ibrahim Merican  
1966 - 1980



Tuan Abu Bakar  
Bin Haji Ismail  
1981 - 1982



Dato' Shaik Mohamed Bin Shaik Abdul Kadir  
1983 - Sekarang

## **BANGUNAN PERSATUAN MELAYU PULAU PINANG**

No. 117, Jalan Macalister,  
10400 Pulau Pinang




## **BANGUNAN PEMENANG**

No. 60, Jalan Cantonment  
10250 Pulau Pinang



*Pusat Kegiatan dan Pentadbiran*



**RENTETAN-RENTETAN KENANGAN-KENANGAN SEJARAH, 88 TAHUN  
PEMENANG SEGABAI ASAS BAGI MENERUSKAN PERJUANGAN SERTA  
MENGUKUHKAN JATI DIRI, BANGSA MELAYU YANG UNGGUL**

1. Berusaha / Berjaya Mengujudkan Tanah Simpanan Melayu di Kampung Melayu, Air Itam, Pulau Pinang (semasa penjajah Inggeris) pada tahun 1928.
2. Berjaya sebagai salah sebuah Persatuan / Pertubuhan yang mengasas dan menubuhkan Pertubuhan Kebangsaan Melayu Bersatu UMNO pada tahun 1946.
3. Berjaya mengasas dan menubuhkan Koperasi Perumahan Orang-Orang Melayu Berhad pada tahun 1964.
4. Berjaya memiliki dan mendirikan Bangunan Persatuan Melayu Pulau Pinang di Jalan Macalister, Pulau Pinang pada tahun 1979.
5. Berjaya menganugerah Tokoh-Tokoh dalam berbagai-bagai bidang Kemasyarakatan sempena sambutan MAAL HIJRAH AWAL MUHARRAM semenjak tahun 1985.
6. Berjaya mengasas dan menubuhkan Syarikat PIEMPIPI (PEMENANG) Berhad untuk pembangunan ekonomi orang-orang Melayu Pulau Pinang serta menambah pemilikan Hartanah orang-orang Melayu Pulau Pinang pada tahun 1996.
7. Berjaya mengasas dan menubuhkan Tabung Biasiswa Kenangan PEMENANG untuk dianugerahkan kepada Anak-Anak Melayu Kelahiran Pulau Pinang dalam bidang pendidikan pada tahun 1997.
8. Berjaya menuju dan memiliki sebuah Bangunan Bangalo di No. 60, Jalan Cantonment, 10250 Pulau Pinang (sekarang dinamakan Jalan PEMENANG) untuk Pusat Pentadbiran PEMENANG.
9. Berjaya menukar dan menamakan sebahagian daripada Jalan Cantonment kepada Jalan PEMENANG, Pulau Pinang (dimana terletaknya Bangunan PEMENANG sekarang) pada tahun 1994.
10. Berjaya mengasas dan menubuhkan Gabungan Persatuan-Persatuan Kebudayaan dan Kesenian Melayu Pulau Pinang pada tahun 2003.

11. Berjaya mengasas dan menubuhkan Ikatan Kelab-Kelab Melayu Negeri Pulau Pinang pada tahun 2003.
12. Berjaya mengasas dan menubuhkan Majlis Perundingan Muhibbah Negeri Pulau Pinang pada tahun 2003.
13. Berjaya mengasas serta mempelupori Penubuhan Muzium Khazanah Melayu / Jawi Peranakan yang sekarang ini dikenali sebagai Pusat Tamadun Melayu Negeri Pulau Pinang pada tahun 2007.
14. Berjaya merancang dengan tujuan untuk mendirikan BANDAR WARISAN MELAYU Pulau Pinang di Bandar Raya George Town Pulau Pinang pada tahun 2011.
15. Berjaya menerusi Syarikat PIEMPIPI (PEMENANG) Berhad. Membeli serta merancang untuk Mendirikan WISMA PMPP di Jalan Argyll, Pulau Pinang Bangunan 8 Tingkat dengan kerjasama Rakan Amanah Raya Berhad (ARB) bermula pada tahun 2010.
16. Berjaya dengan sokongan Persatuan Ibubapa/Guru Sekolah Kebangsaan Kampung Jawa menamakan Sekolah Kebangsaan Kampung Jawa Pulau Pinang dengan nama SEKOLAH KEBANGSAAN TAN SRI P.RAMLEE PULAU PINANG pada tahun 2011.
17. Berjaya mengasas dan menubuhkan KELAB PEMINAT P.RAMLEE PULAU PINANG pada tahun 2011.
18. Berjaya dengan kerjasama Ahli-Ahli Sejarah Melayu dan Ahli-Ahli Profesional Melayu untuk mengasas dan menubuhkan PERTUBUHAN AMANAH WARISAN MELAYU PULAU PINANG (PEWARIS) bagi memelihara dan memulihara Warisan dan Sejarah Melayu Pulau Pinang pada tahun 2012.
19. Berjaya mengujudkan satu Projek Kecemerlangan Akademik (PeKA) untuk memberi tuisyen kepada Pelajar-Pelajar Melayu yang miskin dengan pembiayaan Persatuan Melayu Pulau pinang (PEMENANG) dan Tenaga Pengajar dari Universiti Sains Malaysia (USM) pada tahun 2012.
20. Berjaya mengemukakan cadangan kepada YAB Dato' Seri Mohd Najib Bin Tun Abdul Razak, Perdana Menteri Malaysia supaya Kerajaan Malaysia bersetuju menamakan Jambatan Kedua Pulau Pinang dengan nama "JAMBATAN TUANKU ABDUL HALIM MU'ADZAM SHAH" Semasa Majlis Perasmian Jambatan Kedua pada 1 Mac, 2014.
21. Berjaya menerbitkan Buku Sejarah PEMENANG dalam Bahasa Melayu dan Bahasa Inggeris sempena Menyambut Ulangtahun Yang Ke-87 PEMENANG. Pelancaran Rasmi oleh TYT Tun Dato' Seri Utama (Dr.) Haji Abdul Rahman Bin Haji Abbas, Yang DiPertua Negeri Pulau Pinang disempurnakan pada 27 Mac, 2014.

22. Berjaya mengujudkan satu Program CSR RECSAM 2014, iaitu Bantuan Tuisyen untuk mata pelajaran Sains dan Matematik kepada pelajar yang akan menduduki peperiksaan Sijil Pelajaran (SPM) dengan pembiayaan daripada Dana Kebajikan PEMENANG dan Tenaga Pengajar dari Seameo, RECSAM, Pulau Pinang Majlis Menandatangan Perjanjian (M.O.A.) Program CSR diantara Seameo, RECSAM / PEMENANG disaksikan oleh TYT Tun Dato' Seri Utama (Dr.) Haji Abdul Rahman Bin Haji Abbas, Yang DiPertua Negeri Pulau Pinang pada 5 Jun, 2014.
23. Berjaya mengujudkan sebuah Galeri PEMENANG, sempena Menyambut Ulangtahun Yang Ke-88 PEMENANG Pelancaran Rasmi oleh Y.Bhg. Tan Seri Dato' Seri Utama Dr. Rais Yatim, Penasihat Sosio Budaya Kerajaan Malaysia pada 27 Mac, 2015.
24. Berjaya menganjurkan Forum Pra Kongres Majlis Muafakatan Melayu Malaysia (4M) di Dewan Budaya Universiti Sains Malaysia (USM) Pulau Pinang pada 1 Mac, 2016.
25. Mencadangkan kepada Y.A.B. Perdana Menteri Malaysia dengan mengirimkan Memorandum untuk menamakan Univeristi Teknologi Mara (UiTM) dengan nama Universiti Teknologi Mara Dato' Onn Ja'afar (UiTM DATO ONN JA'AFAR) pada 9 Disember 2016.
26. Mencadangkan kepada Y.A.B. Perdana Menteri Malaysia dengan mengirimkan Memorandum “Tulisan Jawi dan Masa Depannya” : Untuk mewajibkan Pengajaran dan Tulisan Jawi Di Sekolah-Sekolah Rendah, Menengah dan Institusi-Institusi Pengajian Tinggi (IPT) pada 20 Disember 2016.
27. Mencadangkan kepada Y.A.B. Perdana Menteri Malaysia dengan mengirimkan Memorandum mengenai Projek Taman Tugu Negara Dan Pengisian Pahlawan-Pahlawan dan Tokoh-Tokoh Kemerdekaan Tanah Melayu pada 3 Januari 2017.